



Inatsisartunut ilaasortaq Jens Lars Fleischer
Siumut

Pineqarpoq: § 36, imm. 1-imut apeqqut ataaseq

05.11.2006
J.nr. 45.11.34-00001

Asasara Jens Lars Fleischer.

Postboks 1160
3900 Nuuk
Oq/tel +299 34 50 00
Fax +299 32 55 05
peqqip@gh.gl
www.nanoq.gl/peqqik

Peqqinnissaqarfimmi nutaamik suleriaaseqalersinnaaneq pillugu apeqquteqaatinnut qujavunga, tassani apeqqutigaat Uummannap Kommuniani siunissami nakorsaqaarunnaarnissaa siunertaanersoq, tamannalu ilumuussappat tamatumunnga suna tunuliaqutaanersoq?

Ilisimatitsissutigisinnaavara peqqinnissaqarfimmi ukiuni arlalinngortuni sinerissami napparsimmavinni mikinerusuni sulisussanik sivirusumik sulisinnaasunik atorfinitsitsiniartarneq ajornartorsiutaasimammat. Tamatuma malitsigisaanik peqqinnissaqarfik sulisunik piffissami sivikitsuinnarmi sulisussanik taartaagallartartunik atorfinitsitsisarsimavoq, peqqinnissaqarfiullu iluani suliaasaqarfinni tamani sulisussarsiniartarneq sulii ajornakusoorarsuiartuinnarluni.

Inatsisartunut ilaasortap Agathe fontainip 2003-imi ukiakkut ataatsimiinnermi § 36-itut apeqquteqaatigaa peqqinnissaqarfiup nunap immikkoortuinut agguataarsimanera nunap qanoq inneranut saniilliullugu naleqquttuunersoq, atorfinnut aalajangersimasunut sulisussarsiniartarneq taamak ajornakussortigitillugu, uanilu apeqquteqaat Naalakkersuisullu akissutaat takussutissatut ilannguppara.

Aningaasaqarnermut Inatsisissat 2004 aamma 2005-ip oqallisigineqarnerani aalajangersimasumik atorfillit qulakkeerniarlugit aammalu ilaatigut piffissami sivikituinnarmi taartaagallartartunit aningaasaqarnikkut tatineqariartuinnarneq illuatungilersinnaajumallugu peqqinnissaqarfimmi ingerlatseriaatsip nutartertariaqarlersinnaanera pisariaqalersinnaasoq arlaleriarluni erseqqissarneqartarpoq. Innersuussutigineqarput FFL04, 2004-mi Inatsisartunut aningaasaqarnikkut inatsisissatut siunnersuummut nalinginnaasumik oqaaseqaatit, *Imm. 3.2.1., Peqqissuseq: Ukiumoortumik aalajangersimasumik sinaakkutissiap iluani ingerlatseriaatsimik allannguineq tulleriissaarinerlu, qup, 73, aamma*

FFL05, Inatsisartunut aningaasaqarnikkut inatsisissatut siunnersuummut nalinginnaasumik oqaaseqaatit,, *Imm. 3.3, Peqqissuseq*, qup. 82.

Tamanna tunuliaqutaralugu Naalakkersuisut akuersissutigalugulu aallateqqaat Peqqissutsimut Pisortaqarfik 2004-mi peqqinnissaqarfiup iluani nutaamik ingerlatseriaaseqalernissamut siunnersuummik saqqummiussaqaarnissaa siunertaralugu sukumiinerusumik nassuiaasiornissaa. Taamaattumik suleqatigiissitaq pisortaqarfimmiit suliaasaqarfimmiit arlalissuarniit sulisunit inuttalersorneqartoq pilersinneqarpoq.

Suleqatigiissitaq peqqinnissaqarfimmut ingerlatseriaasissamut nutaamut siunnersuutaagallartoq suliaraa, taannalu peqqinnissaqarfiup aqutsisuisa 2006-mi aprillimi isumasioqatigiinneranni saqqummiunneqarpoq. Siunnersuutissamut aallarniutaasup taassuma napparsimmavinni ataasiakkaani illup iluani atugassatut tusarniaassutissatut sulisut oqallisigeqatigineqassasut aalajangiunneqarpoq, tamannalu pereerpoq. Peqqinnissaqarfimmi Aqutsisut isumasioqatigiinneranni peqataasut ilisimatinneqarput, taanna peqqinnissaqarfiup iluani atugassatut suliaasoq aammalu suli inaarutaasumik naammassineqarsimanngitsaq.

Peqqinnissaqarfimmit ingerlatseriaatsimut nutaamut tunngavissaagallartoq suleqatigiinnit aqutsissuusunit taakkulu ataaniittunit suleqatigiissitanit Peqqissutsimut Pisortaqarfimmit, Peqqinnissaqarfimmi Aqutsisunit Dronning Ingridip Napparsimmavissuaniillu inuttaqartunit tallimaasunit suliarineqarsimavoq. Peqqinnissaqarfimmi Aqutsisut isumasioqatigiinneranni aalajangiunneqarpoq, suleqatigiitsitat suli arfinillit pilersinneqassasut – sinerissami napparsimmavinni Peqqissaanermik Ilinniarfimmilu sulisunit inuttalersorneqartussat – taakku siunnersuummi immikkut erseqqissarlugit taaneqarsimasut misissoqqissaassallugit. Suliaq taanna maanna naammassingajalerpoq.

Naalakkersuisut peqqinnissaqarfiup ingerlatseriaasianut nutaamik ilusilersuinissamut siunnersuummut nassuiaammik **suli** tigusaqarsimanngillat. Tamanna 2006-ip naalerneranni pissaaq, Naalakkersuisunilu politikkikkut oqallinneq aallaavigalugu peqqinnissaqarfimmi ingerlatseriaatsimut allannguinnissamut siunnersuusiornermut suliaq pillugu piffissaliussatut pilersaarutip nanginnera tassaassaaq Inatsisartut 2007-imi ukiaanerani ataatsimiinnissaannut nassuiaammik saqqummiussisoqaarnissaa. Inatsisartuni politikkikkut tunngaviusumik oqallinneq tunngavigalugu siunnersuut aqqissorluariarlugu suliffeqarfimmut attuumassuteqartunut tusarniaassutigisassanngorlugu nassinneqassaaq, tassunga ilanngullugu KANUKOKA, soorluli naalakkersuisut innuttaasut oqallitsinneqarnissaat paasititsiniaavigneqarnissaallu qularnaarniaraat.

Manna tassa Peqqissutsimut Piosortaqrifiup peqqinnissaqarfinnilu
assigiinngitsuni suliaqartut peqqinnissaqarfimmi nutaamik
ingerlatseriaaseqalernissamik suliaasa suliallu qanoq ingerlasimaneranut
tunuliaqutaasoq. Ingerlatseriaatsimik allannguinnessaq tamatumalu nunap
immikkoortortani peqqinnissaqarfinnut qanoq
sunniuteqarumaarsinnaanera qanorlu kinguneqarumaarnersoq maannakkut
oqaaseqaateqarfigissallugu sulii siusippallaarpoq.

Naggataarutaasumik oqaatigissavara Inatsisartut taamanikkut
maannakkullu Inatsisartut peqqissutsimut ataatsimiitsitaliaat ataavartumik
qulaani taaneqartut pillugit ilisimatinneqareersimammata.

Inussiarnersumik inuulluaqqusillunga

Asii Chemnitz Narup